



16. august 2024

UKA 2024/119

Matumuuna Inatsisartut ingerlatsinermut maleruagassaanni § 33 tunggavigalugu isummerfigisassatut ima siunnersuuteqarpunga:

**Najugaqatigiiffinni tamani pisortanit pigineqartuni ajornartorsiutip siusissukkut iliuuseqarfigineqartarnissaa siunertaralugu inissiani attartortittakkani aaqqissuussamik ikinnerpaamik ukiumut ataasiarluni oqoqassutsimik misissuisoqartalernerata aningaasatigut allaffissornikkullu kingunerisassaannik qulaajaaviusussamik Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaammi taamatuttaaq qitiusumik qarasaasiatigut paasissutissaasivimmik assigisaanilluunniit misissuinernik nalunaarsuiviusussamik pilersitsineq eqqarsaatigalugu tamatumani aningaasatigut kingunerisassai qulaajarneqassapput. Najugaqartunut oqummik sapigalinnut pisortallu inissiaataanni attartortittakkami oquttumi najugaqarsimanerup malitsigisaanik nappaateqalersimasunut immikkut ilisimasalinnit peqqissutsikkut ikiorsiinissamut tapersersuinissamullu neqerooruteqartoqartalerpat tamatuma aningaasatigut kingunerisassai nassuiaammi qulaajarneqassapputtaaq.**

(Inatsisartunut ilaasortaq Anna Wangenheim, Demokraatit)

#### **Tunggavilersuut**

Naalakkersuisut aamma INI A/S § 37-apeqqutinut normu 105-2024-mut akissuteqarput, aalajangersimasumik inissiat attartortittakkat nakkutigineqanngitsut<sup>1</sup>.

Malinnaasimanginnerup kinguneraa innuttaasut peqqissusaannut kingunerlutsitserujussuarnera, pingaartumik pisortat inissiaataanni attartortittakkani, aserfallatsaaliinermut kinguaattooqarujussuarnerup kingunerisaanik. Ajornartorsiutip taassuma ulorianartumik kinguneraa oqoqarnera, ineqartunut peqqissutsikkut ajortorujussuarmik kingunerlutsitsinnaasumik.

Kingullermik taarsiivigittoqarpoq, sulisoq inuussutissarsiorsinnaanerninik annaasaqarnini pissutigalugu taarsiivigineqarmat pissutigalugu, sulisoq inissamik tunineqarsimammat, oqummik eqqorneqasimasumik.<sup>2</sup> Maani Kalaallit Nunaanni, sianiginngikkipput, inuit qassit, pisortat pigisaanni attartortakkani najugaqarnerminni napparsimalersimasut, oqummik eqqorneqarsimasuni<sup>3</sup> peqqissutsimut ajornartorsiuterujussuanngoriataannaavoq.

Oquk illuni nutaangitsuni aserfallatsaaliorneqartanngitsunilu nalinnaasumik piusarpoq. Oqummik eqqugaaneq peqqissutsikkut ajorluinnartumik kinguneqarsinnaavoq, anersaartorniarnermikkut ajornartorsiuteqalerlutik, astmalerlutik sapigaqalerlutilluunniit. Oqummik sapigaqalersimasutut nappaatit kingunerisartakkat ilagaat qasoqqasuaannalernerq, niaqorlunneq, amerlunneq ajornerpaaffianilu timimi aseruuttoqarneq. Ineqartut oqoqartumi ineqartut annertuumik peqqikkunnaartarput. Peqqissutsikkut

<sup>1</sup> 2024-mi § 37 naapertorlugu apeqqutit 105-mut akissutit

<sup>2</sup> Timmisartortartoq oqummik pissuteqartumik sulisinnaajunnaarnerminut millionilikkaanik taarsiiffigineqarpoq - Sermitsiaq.ag 12-07-2024

<sup>3</sup>2024-mi § 37 naapertorlugu apeqqutit 105-mut akissutit



ajornartorsiutit piujuartussat pitsaanngitsumik ineqarsimanerup kingunerisaanik peqqinnissaqarfimmut suliaqqarsuutaasarput. Pisortat init attartortittagaat amerlasuut pitsaanngillat aserfallatsaalineqartaratillu nutarterneqartanninnertik pissutigalugu. Aaqqissuinerit kinguaattoornerujussuisa init pitsaannginnerulersippaat peqqissutsimut ajoqutaariaannangorlugit.

Init attartortittakkat pisortanit pigineqartut nakkutigineqartanninnerisa kinguneraat, oqummik ajornartorsiut tamakkiisumik ilisimaneqannginnera. Taamaattumillu aamma ajornakusoorpoq init sumiinneri paasissallugit, aaqqissorneqarnissaminnut pisariaqartitsinerpaat tullerriaasallugit, tamannalu naggataatigut innuttaasut peqqissusaannut inuiaqatigiillu aningaasaqarnerannut ajoquseeqataavoq.

Tamanna tunngavigalugu Demokraatit isumaqarput, nassuiaammik suliaqartoqassasoq, inissiani attartortittakkani pisortanit pigineqartuni ukiumoortumik oqummut misissuisarnissat aningaasatigut allaffissornikkullu kingunerisinnaasaasa takussutissaannik. Nassuiaat minnerpaamik ukuninnga imaqartinneqartariaqarpoq:

- Qanoq akeqassava qitiusumik paasissutissanik nalunaarsuiffissamik pilersitsineq taassumallu ingerlanneqarnera, inissiani attartortittakkani pisortanit pigineqartuni tamani qanoq innerinik paasissutissanik katersinissaq?
- Pisortat attartortittagaanni oqummik allanillu peqqissutsimut ulorianartorsiortitsinnaasunik inatsisitigut sumiissusersinissamut misissuisarnissap eqqunneqarnera qanoq akeqassava?
- Minnerpaamik ukiumut ataasiarluni aaqqissuussamik pisortat attartortittagaanni inissiani tamani oqummut misissuisoqartarnerup eqqunneqarnera qanoq akeqassava? Tassani attartortut peqatigalugit pisussaaffik nalunaaruteqartarnissamik eqquneqarsinnaavoq aamma, malittarisassiornikkut qulakkeerniarlugu attartortoq aamma oqoqannginnissaanut pinaveersaartitsinermik akisussaaffeqartoq.
- Qanoq akeqassava immikkut ittumik ilisimasalimmik peqqissutsimut ikiuineq tapersersuinerlu attartortunut, oqummik sapigaqartunut tassungalu attuumassuteqartunik nappaateqartunut?

Nakkutilliinissamut pisussaaffimmik eqqussineq aammalu ataavartumik pisortat attartortittagaanni oqummut misissuisarnerit alloriaataassapput pingaaruteqarluinnartut innuttaasunut tamanut peqqinnartunik ineqartitsinissamut. Inuit peqqissusaannut pitsanngorsaataaginnarani, aamma peqqinnissaqarfimmut aningaasartuutaasartunut apparsaataassaaq ineqartullu peqqinnerulersillugit. Pisariaqarpoq ineqarnerup pitsaanngitsup kingunerisaanik peqqissutsimut kingunerluutai akuerissallugit iliuuseqarfigalugillu kikkunnut tamanut pitsaanerusumik peqqinnarnerusumillu ineqartitsinikkut.

Tamanna tunngavigalugu neriuutigaarput, Naalakkersuisut aammalu Inatsisartuni partiit sinnerisa misissuisitsinissamik siunnersuut una taperserumaaraat.

#### **Pisortanut aningaasatigut allaffissornikkullu kingunissai**

Misissuinerup ingerlanerani aningaasartuuteqassaaq. Taakkuli atorfilittap ukiumut akissarsiaasa 500.000 koruunit qaangerneqarnissaat naatsorsuutigineqanngilaq.

#### **Naminersorlutik inuussutissarsiteqartunut aningaasatigut allaffissornikkullu kingunissai**



Soqanngilaq.

**Innuttaasunut aningaasatigut allaffissornikkullu kingunissai**  
Soqanngilaq.